

Script of Morning Gojri News Bulletin 11 May 2025 at 1015Hrs

ما رننگ گو جری نیوز بلیٹن مورخہ 11 مئی 2025

یوہ آکاشوانی جموں ہے محمد امین انجم تیں خبر سُنو۔

Ceasefire

بھارت اور پاکستان بھکار جنگ بندی اقرار نامہ تیں بعد کل جنگ بندی معاہدہ غی اک مختصر خلاف ورزی غی رپورٹ ملی، جس غی وجہ نال سرحدی علاقہ غا باشندان مانہہ فکر مندی پھیل گئی۔ حالانکہ اُس تیں بعد پھر بو ر واقع غی رپورٹ نہیں ہے، تے اس طرح قبضہ لکیر غے نال اور بین القوامی سرحد ور صورتحال معمول ور مڑ آئی۔ اس سلسلہ مانہہ سلامتی دستہ چوکس رہیا اور حکام نے خطہ مانہہ نگرانی جاری رکھی، تاجے امن تے استحکام جاری رکھنو یقینی بنایو جا سکے۔

PM Meeting

بھارت اور پاکستان بھکار جنگ بندی غا اعلان تیں تھوڑی دیر بعد وزیر اعظم نریندر مودی نے نوی دہلی مانہہ اپنی رہائش گاہ ور اک اعلیٰ سطحی میٹنگ غی صدارت کی۔ میٹنگ مانہہ خارجہ امور غا وزیر ایس جے شنکر، وزیر دفاع راجناتھ سنگھ، قومی سلامتی غا مشیر اجیت ڈووال، دفاعی عملہ غا سربراہ تے تریاں خدمات غا سربراہان نے میٹنگ مانہہ شرکت کی۔

Home Sec

مرکزی داخلہ سیکریٹری گویند موہن نے ریاستان غا چیف سیکریٹریاں نال کل ویڈیو کانفرنسنگ غے ذریعے اک میٹنگ منعقد کی۔ یاہ میٹنگ اُن ریاستان غا چیف سیکریٹریاں نال لگی، جن ریاستان غی سرحد پاکستان نال لگے۔ ذریعے نے دسیوے جے ریاستان نانہہ کہیو گیو ہے جے ویں چوکس رہیں تے سول دفاعی ترکیب حرکت مانہہ رکھیں۔ قابل ذکر ہے جے یاہ میٹنگ بھارت پاکستان بھکار جنگ بندی تیں کُجھ گھنٹہ بعد مانہہ منعقد ہوئی۔

CM, Ceasefire

جموں کشمیر غا وزیر اعلیٰ عمر عبداللہ نے بھارت اور پاکستان بھکار جنگ بندی غا اعلان غو استقبال کیو ہے جے اس کا روانی غا نتیجہ مانہہ زندگیں بچیں گی۔ وزیر اعلیٰ نے امن تے انسانی بنیاد ور حمایت بارے سرکا ر غا عزم غو ذکر کرتاں واں کہیو ہے جے متاثر لوکان نانہہ ترجیح بنیاد ور رلیف مہیا کرائی جا ئے گی۔

LG, CM Meet

جموں کشمیر غا لیفٹنٹ گورنر منوج سنہا نے وزیر اعلیٰ عمر عبداللہ نے کل راج پھون سرینگر مانہہ سول سوانٹی غا ممبراں، مذہبی لیڈراں تے بیوپاریاں بارے نمائنداں نال گل بات کی۔ لیڈراں نے اتحاد، سماجی بھائی

چارہ ور زور پایو۔ سماجی بھائی چارہ ور زور دیتاں واں وزیر اعلیٰ عمر عبداللہ نے لوکاں ناتہ اپیل کی جے ویں ایمانداری غا سفیراں غا طور کم کریں۔ اس موقع ور حالیہ تشدد غے بشکار لوکاں واسطے 2 منٹ غی خاموشی اختیار کی گئی۔

Pak Loss

بھارت غے خلاف عمل تیں بعد پاکستان نانہ بڑو متو نقصان پُجیو ہے۔ اس سلسلہ ماتہ آپریشن سِندور غے ذریعے نوی دہلی غی طرفوں اسلام آباد نانہ بڑو نقصان پُجایو گیو ہے۔ اس سلسلہ ماتہ کل نویں دہلی ماتہ اخبا ری نمائنداں نال گل کرتاں واں بھارتی فوج غی کرنل صوفیہ قریشی نے کہیو جے بھارت غی کا روانی غو مقصد گلی طور ور دہشت گرد کیمپ تباہ کرنا تھا، جہیزا بھارت غے خلاف اشتعال کیا جا رہیا تھا۔ اُنہاں نے کہیو جے پاکستان نے غلط جانکاری پھیلان واسطے کنیں کوشش کیں تے بھارت غا ایس 400 اور برہمو میزائل نانہ جے ایف 17 نال تباہ کرن غو پاکستان غو دعویٰ مکمل طور بے بنیاد ہے۔ اسے طرح فضائیہ غی کمانڈر نے وی پاکستان غی اس غلط جانکاری نانہ مسترد کر دتو ہے۔ جس ماتہ اُس نے کہیو جے بھارت غا سیرسا، جموں، پٹھانکوٹ، بٹھنڈا، نالیہ اور بُھج ماتہ ہوائی اڈاں نانہ نقصان پُجایو گیو ہے۔ اسے دوران بحریہ غا کمانڈر رگھونیر نے کہیو جے پہلگام واقع تیں بعد بھارت غو ردِ عمل ذمہ دارانہ تھو۔ تے دوجا پاسا تیں بڑی متی غلط جانکاری عام کی گئی۔

BCCI

کرکٹ کنٹرول بارے بورڈ بی سی سی آئی غا صدر راجیو سُکلا نے کہیو ہے جے بورڈ غا عہدیدار اور آئی پی ایل گورننگ کونسل بھارت اور پاکستان بشکار جنگ بندی غا اعلان تیں بعد اج ایس ٹی 20 لیگ نانہ مکمل کرن پا رہے بہتر طریقہ کار تیار کرے گی۔ جہیزا معطل کی گئی تھی۔ واضع رہے جے بورڈ نانہ مجبوراً انڈین پر نمر لیگ آئی پی ایل نانہ جمعہ غے روز معطل کرنو پئیو تھو جد کہ اس سلسلہ ماتہ 16 مقابلہ اجوں باقی تھا۔

National Tech Day

اج ٹیکنالوجی بارے قومی تہاڑو منایو جا رہیو ہے۔ اج غے روز 1998 ماتہ بھارت نے راجستھان گا پوکھران ماتہ کامیابی نال جوہری ہماں غو تجربو کیو تھو۔ یوہ دِن مُلک غی ترقی ماتہ ٹیکنالوجی غا اہم کردار غی یاد تا زی کراوے۔ اج غو تہاڑو سائنسداناں اور انجینئراں غی خدمات یاد کراوے۔

Fact check

پاکستان غی جا رحیت غے خلاف بھارت غی سخت کاروائی غا ردِ عمل ماتہ پاکستان اجوں وی غلط جانکاری عام کرن غی مہم چلایاں واں ہے۔ تے اس سلسلہ ماتہ جھوٹی ویڈیو عام کی جا رہی ہیں۔

Ramban

نوجوان خدمات تے کھیڈاں بارے محکمو رام بن ماتہ بکھ بکھ سرگرمیاں غے ذریعے کھیڈاں نانہہ باندو دے
ریو ہے۔ جن ماتہ کھوکھو، کبڈی تے بیڈمنٹن شامل این۔ ان شرعاتاں نال طالب علماں غی کھیڈاں آلیے پاسے
دل چسپی غی عکاسی ہوئے۔

اس غے نال ہی خبراں غو یوہ بلیٹن ختم ہوؤ۔